

և անվճար աշխատաւոր ժողովրդին յանձնելով՝ հողից հաւասարաբար օգտուելու սկզբունքով (ծափեր) :

Յետոյ, նոյն ընկերային օրէնսդրութեան ասպարէզում, Դաշնակցութեան Փրակցիան ձգտելու է իր նւագագոյն ծրագրի իրականացման նրա բովանդակ ծաւալով՝ առաջին հերթին դնելով օրէնսդրական կարգով 8 ժամ-ւայ աշխատանքի օրւայ հաստատման, աշխատանքի պետական հովանաւորութեան և բանւորների ապահովութեան պահանջը (ծափեր) :

Քաղաքա-տնտեսական բարենորոգումների բնագաւառում Փրակցիան պահանջելու է պետական նշանակութիւն ունեցող և ընկերվարական արտադրելիքի համար բաւականաչափ հասունացած խոշոր Փինանսական, արդիւնաբերական և առևտրական ձեռնարկութիւնները հասարակութեան սեփականութիւն դարձնել, այլ և արդիւնաբերութեան վերահսկողութեան և ընդհանուր աշխատաւորական պարտաւորութեան հաստատում :

Վերոյիշեալներին զուգընթաց, օրւայ մեծագոյն քաղաքական խնդիրն է հանդիսանում Անդրկովկասի ճիշտ սահմանաբաժանումը, ժողովուրդների ինքնուրոյն կանտոնների ստեղծումը և նրանց միացումը Անդրկովկասեան ընդհանուր դաշնակցութեան մէջ : Նոր կարգի ամրութիւնն ու կայունութիւնը, երկրի ներքին խաղաղութիւնն ու բովանդակ բարեկեցութիւնը ամենասերտ կերպով կապւած են այս բարդ խնդրի բաւարար լուծման հետ, ուստի և պահանջւում է նրա հանդէպ առանձնապէս ուշադիր վերաբերում :

Յիշւած խնդիրների իրականացման Հ. Յ. Դաշնակցութիւնը կը նւերի իր բոլոր ուժերը՝ երկրի բոլոր ղեմավարտների հետ կատարեալ համերաշխութեան և բարեկամական դործակցութեան մէջ :

Միաժամանակ Դաշնակցութիւնը, իբրև միջազգային ընկերվարական ընտանիքի անդամներից մէկը, անյողդողջ հաւատն ունի, որ Անդրկովկասեան Սէյմը իր յետագայ զարգացման ընթացքին կը դառնայ ընկերվարական մտքի ու ստեղծագործութեան հնոց և միջոց Անդրկովկասեան Ընկերվարական միջազգայինի (ծափեր) : *

Այսպիսով, Դաշնակցութիւնը առաջադրում էր օրւայ հրատապ նշանակութիւն ունեցող չորս խնդիրներ . 1) Ինքնուրոյն Անդրկովկասը համարւում է մասնիկը Ռուսաստանի . 2) պատերազմը վերջացնելու պայման դրւում է Թիւրքահայաստանի ինքնավարութիւնը . 3) Անդրկովկասի վերաբաժանումը ազգային կանտոնների և 4) միատար-ըկերվարական իշխանութեան կազմակերպումը :

Այս չորս պայմաններն էլ հանդիպեցին Ազրբէյջանի ներկայացուցիչների բռն ղեմագործութեան : Նրանց կողմից յայտարարութիւն անող Աղայեւը գտնում էր, որ Սէյմը պէտք է լինի Սահմանադիր ժողով՝ լուծելու համար Անդրկովկասի ճակատագիրը, որը կտրւած է Ռուսաստանի ընդհանուր ճակատագրից : Ծիշտ է, Աղայեւը դեռ խօսում էր «ազատ ժողովուրդների Ռուսաստանի», «դաշնակցութեան», «Ազրբէյջանի ազգային-քաղաքական ինքնավարութեան» մասին, բայց այդ, աւելի չուտ, տուրք էր օրւայ ընդհանուր տրամադրութիւններին :

Պատերազմի խնդրում Աղայեւն ևս պահանջւում է «ռամկավար հաշտութիւն, առանց բռնագորաւումների և ռազմատուգանքի, ժողովուրդների

*) Закавказский Сейм. Стеногр. отчет. Сессия первая, заседание третье. 1918. Тифлис, стр. 15.